



La consorta da Dea Murk, Filomena Murk-Vinzens ensemen cun la feglia Flurina Simmen-Murk (dretg) ed il fegl Gieri Murk e sia consorta Séverine Murk-Lendi cun occasiun dalla vernissascha.

FOTOS H. HUONDER



Ina da biaras interessantas ovras da Dea Murk, exponidas il museum sursilvan ella Cuort Ligia Grischa a Trun.

«Nua ch'il tat era, era la fantasia»

Entochen la fin d'october ein ovras ord il relasch digl artist Dea Murk da veser a Trun

DA HANS HUONDER / ANR

■ **Biars parents, amitgs ed enconuschents digl artist Dea Murk, ch'ei morts avon diesch onns, han assistiu la sonda suentermiezdi alla vernissascha dall'exposiziun d'ovras ord siu relasch. Ellas ein da veser entochen la fin d'october el Museum sursilvan dalla Cuort Ligia Grischa a Trun.** Ils 21 da fenadur 2003 ei Dea Murk morts en siu mises a Crusch-su en Val Medel. Leu aveva el anflau siu refugi, oravontut durent il temps da catscha. El contuorn dil Muraun eis el serendius biars onns alla catscha, ils davos onns ensemen cun ses fegls *Ursin e Gieri*. Che Dea Murk era in amitg dalla natira era bein enconuschent. Alla vernissascha da sia exposiziun la sonda a Trun ha sia biadia *Patrizia Simmen* sutastrihau quei en ina moda e maniera zun persunala: «A nus biadis ha el mussau la natira en ina moda e maniera da giug. Cun siu perspectiv anflava el adina ina tscharva ni in cavriel ch'era

lunsch naven, dall'autra vart dalla val. Per nus era ei clar ch'il tat era il sulet che saveva adina cattar ad agur in animal selvadi.» Patrizia Simmen ha capiu da tschaffar igl interess dils numerus visitaders dalla vernissascha.

Plein fantasia

«Per scuvierer la natira en sia entira varietad e da guder ella cumpleinamein astga enzatgei buca muncar: La fantasia. Leu nua ch'il tat era, leu era la fantasia», seregorda Patrizia Simmen. Ord in carpun hagi il tat fatg in elefant e cura ch'in tac caffè eri curdaus sin in pupi fagevi el ordlunder in dessegn. Ord ina spassegida seigi daventau in viadi plein aventuras ed alla fin da quel sesanflavi ina casetta cun in stria davos la finiastra. Ideas muncavien buca. «Sch'jeu mirel oz sils maletgs dil tat, lu splendan quels las bialas uras cun el. Ses maletgs animeschan mei en mia fantasia, da sentir e veser la natira», di Patrizia Simmen. Ensemen cun sias soras hagi ella fatg bein enqual studi vid in ni l'auter ma-

letg: «Mintgin vesa quels maletgs cun ses eglis ed interpretescha els autramein.» Il Museum sursilvan ella Cuort Ligia Grischa a Trun muossa entochen la fin d'october ina partida ovras da Dea Murk, differentas ch'ei era vegnidas realisadas ils davos onns da sia activitad artistica intensiva. La collecziun da maletgs ei en possess dalla cuminionza dils artavels da Dea Murk. L'exposiziun a Trun ei vegnida formada da sia brit *Séverine Murk-Lendi* ch'ei engaschada sil sector dalla grafica, leu nua che Dea Murk era professionalmeins medemamein da casa. La davosa exposiziun cun ovras da Dea Murk ei stada da veser 2004/05 el Forum da cultura da Würth a Cuera.

Art ellas aveinas

Dea Murk ch'ei naschius ils 29 da matg 1932 a Surava ei carschius si surtut a Razén. Da cheu anora ha el scuvretg il mund, mo oravontut igl art. Suenten la Scuola d'art sco graficher a Losanna ha Dea Murk studegiu e luvrau denter auter a

Paris e Ruma avon che returnar el Grischun. A Cuera eis el allura staus engaschaus sco graficher da reclama. Sco quei che siu fegl Gieri sa ha el entschiet gia sco giuvenil a designar ed en cumbinaziun cun sia professiun ha el saviu seperfectuar sin quei sector. El ei per exempel staus responsabels per biars interessants placats d'occurrenz. Che la cuminionza d'artavels ei sedecidida da mussar il relasch da Dea Murk a Trun ha in motiv tut special. Sia consorta, *Filomena Murk-Vinzens*, ei numnadamein oriunda da cheu e tgira a Trun aunc adina biaras relaziuns persunalas. Mo era Dea Murk ei staus ligiaus cun Trun sin differents camps. Aschia era el cheu commember dil chor e dalla secziun da catschadurs. Las relaziuns digl artist, mo era da sia consorta, ein lu era stadas il motiv ch'il president dalla fundaziun dalla Cuort Ligia Grischa, *Giusep Decurtins-Deplazes*, ha saviu beneventar fetg bia gliued alla vernissascha.

Ulteriuras informaziuns: www.deamurk.ch